



ԿՈՌՈՒՊՑԻԱՅԻ ԿԱՆԽԱՐԳԵԼՄԱՆ ՀԱՆՁՆԱԺՈՂՈՎ

ՎԻՎ/433/2025

Ո Ր Ո Շ ՈՒ Մ

ՎԱՐՉԱԿԱՆ ԻՐԱՎԱԽԱԽՏՄԱՆ ՎԵՐԱԲԵՐՅԱԼ ԳՈՐԾԻ ՎԱՐՈՒՅԹԸ ԿԱՐՃԵԼՈՒ ՄԱՍԻՆ

ք. Երևան

03 նոյեմբերի 2025թ.

Կոռուպցիայի կանխարգելման հանձնաժողովը, կազմով՝ Մարիամ Գալստյանի (նիստը նախագահող) Արամայիս Փաշինյանի և Արմեն Մարությանի (այսուհետ՝ Հանձնաժողով) 2025 թվականի նոյեմբերի 3-ին քննելով «Ապրելու երկիր» կուսակցության (այսուհետ՝ նաև Կուսակցություն) նախագահ Մանե Թանդիլյանի կողմից Վարչական իրավախախտումների վերաբերյալ օրենսգրքի (այսուհետ՝ Օրենսգիրք) 189.16-րդ հոդվածի 1-ին մասով նախատեսված զանցանքի հատկանիշներով առերևույթ խախտման կապակցությամբ հարուցված վարչական իրավախախտման վերաբերյալ թիվ ՎԻՎ/433/2025 գործը՝

Պ Ա Ր Զ Ե Ց

1. Վարչական իրավախախտումների վերաբերյալ գործի վարույթի նախապատմությունը

1.1 Հանձնաժողովը, «Կոռուպցիայի կանխարգելման հանձնաժողովի մասին» օրենքի 24-րդ հոդվածի 1-ին մասի 27-րդ կետով սահմանված Հանձնաժողովի լիազորությունների շրջանակներում, նույն օրենքի 40.1-ին հոդվածով սահմանված կարգով իրականացնելով նույն օրենքի 23-րդ հոդվածի 1-ին մասի 9-րդ կետով վերապահված գործառույթը և հիմք ընդունելով Կուսակցության 2023-2024 թվականների տարեկան հաշվետվությունների (այսուհետ նաև՝ Տարեկան հաշվետվություններ) ստուգման և աուդիտի արդյունքում վերհանված տվյալները, պարզել է, որ 2023 թվականի

ընթացքում Կուսակցության կողմից չի պահպանվել «Կուսակցությունների մասին» սահմանադրական օրենքի (այսուհետ՝ Սահմանադրական օրենք) 24-րդ հոդվածի 5-րդ մասով սահմանված՝ ֆիզիկական անձի կողմից կուսակցությանը տրվող, օրենքով սահմանված սահմանաչափը գերազանցող նվիրատվությունների ստացման դեպքում կուսակցությունը պարտավոր է ստանալուց հետո՝ երկու շաբաթվա ընթացքում կուսակցության համար սահմանված նվիրատվության գերազանցող մասը կամ նվիրատվությունն ամբողջությամբ նվիրատուին վերադարձնելու, իսկ դրա անհնարինության դեպքում՝ պետական բյուջե փոխանցելու պահանջը:

Հանձնաժողովի կողմից Կուսակցության բանկային հաշիվների քաղվածքների ստուգման արդյունքում պարզ է դարձել, որ 2023 թվականին Կուսակցության՝ 2470075688650000 բանկային հաշվին, առկա են ֆիզիկական անձանց կողմից կատարված Սահմանադրական օրենքով սահմանված չափը գերազանցելու դեպքեր: Մասնավորապես, Արամ Մանուկյանի և Ալետա Հարությունյանի կողմից կատարվել են հետևյալ նվիրատվությունները.

1. Մանուկյան Արամ՝ սեպտեմբերի 1-ին՝ 2,500,000 ՀՀ դրամ, հոկտեմբերի 30-ին՝ 100,000 ՀՀ դրամ, նոյեմբերի 30-ին՝ 100,000 ՀՀ դրամ:

2. Հարությունյան Ալետա՝ սեպտեմբերի 5-ին՝ 2,950,000 ՀՀ դրամ, սեպտեմբերի 6-ին՝ 2,500,000 ՀՀ դրամ:

Այսինքն, 2023 թվականի ընթացքում Արամ Մանուկյանի կողմից հաշվետու տարում Կուսակցությանը փոխանցվել է ընդհանուր՝ 2,700,000 ՀՀ դրամ, իսկ Ալետա Հարությունյանի կողմից 5,450,000 ՀՀ դրամ գումար, որից 450,000 ՀՀ դրամը Կուսակցության կողմից այն ստանալուց հետո՝ երկշաբաթյա ժամկետում, վերադարձվել է նվիրատուին:

Արդյունքում, վերը նշված նվիրատվությունների չափը գերազանցում է մեկ ֆիզիկական անձի կողմից Կուսակցությանը տրվող նվիրատվության՝ Սահմանադրական օրենքով սահմանված առավելագույն չափը՝

1. Ալետա Հարությունյանի դեպքում՝ **2,500,000 ՀՀ դրամի չափով,**

2. Արամ Մանուկյանի դեպքում՝ **200,000 ՀՀ դրամի չափով:**

1.2 Վերոնշյալ առերևույթ իրավախախտման հայտնաբերմամբ պայմանավորված՝ Հանձնաժողովը 2025 թվականի հոկտեմբերի 1-ի թիվ 01/3704-2025 գրությամբ Կուսակցության նախագահին ծանուցել է Կուսակցության կողմից օրենքով սահմանված չափից ավելի կամ նվիրատվությունն օրենքով սահմանված ժամկետներում պետական բյուջե կամ նվիրատուին չփոխանցելու զանցանքի հատկանիշներով առերևույթ իրավախախտման վերաբերյալ՝ միաժամանակ առաջարկելով վերջինիս ծանուցումն ստանալուց հետո՝ 3-րդ աշխատանքային օրը՝ ժամը 14:00-ին, ներկայանալ Հանձնաժողով վարչական իրավախախտման վերաբերյալ արձանագրություն կազմելուն մասնակցելու, իսկ 5-րդ աշխատանքային օրը՝ ժամը 14:00-ին՝ գործի քննությանը մասնակցելու նպատակով:

1.5 Նշված ծանուցումը ուղարկելուց հետո՝ երկշաբաթյա ժամկետում, Հանձնաժողովը չի ստացել հետադարձ ծանուցումը, ուստի 2025 թվականի հոկտեմբերի 21-ին նշված ծանուցումը՝ N 01/3958-2025 գրությամբ, ուղարկվել է Երևանի քաղաքապետին և միաժամանակ տեղադրվել է Հայաստանի Հանրապետության հրապարակային ծանուցումների պաշտոնական ինտերնետային (www.azdarar.am) կայքում, որից հինգ օր հետո ծանուցումը համարվել է հանձնված:

1.6 2025 թվականի հոկտեմբերի 30-ին պատշաճ ծանուցված Մանե Թանդիլյանի ներկայացուցիչ Արաքսյա Գրիգորյանի ներկայությամբ կազմվել է թիվ ՎԻՎ 490/25 արձանագրությունը՝ Օրենսգրքի 189.16-րդ հոդվածով նախատեսված առերևույթ իրավախախտման հատկանիշներով:

1.7 Վարչական իրավախախտման վերաբերյալ գործի քննության տեղի և ժամանակի մասին պատշաճ ծանուցված Մանե Թանդիլյանի ներկայացուցիչ Արաքսյա Գրիգորյանի ներկայությամբ 2025 թվականի նոյեմբերի 3-ին, ժամը՝ 14:00-ին, տեղի է ունեցել վարչական իրավախախտման վերաբերյալ գործի քննություն:

II. Վարույթի մասնակցի ներկայացրած դիրքորոշում ու պարզաբանումներ

Մանե Թանդիլյանի ներկայացուցիչ Արաքսյա Գրիգորյանը արձանագրության կազմման ընթացքում հայտնել է հետևյալը.

«Մանե Թանդիլյանը հանդիսանում է Կուսակցության նախագահը, ով սկզբունքային է Կուսակցության ֆինանսավորման թափանցիկության և հաշվետվողականության սկզբունքների պահպանման հարցում: Արամ Մանուկյանի կողմից Կուսակցությանը կատարված մի քանի նվիրատվությունները, ըստ թվային արտահայտության, նվիրատվությունը կատարելու պահին կասկած չեն հարուցել, քանի որ առանձին կատարված նվիրատվությունները եղել են օրենքով սահմանված չափով, բացի այդ նվիրատվությունները կատարվել են տարբեր ժամանակահատվածներում, Կուսակցության քաղվածքները դիտարկվել են ըստ ամսական պարբերականության, ուստի այն փաստը, որ դրանց հանրագումարը գերազանցել է օրենքով սահմանված առավելագույն շեմը, թվական արտահայտությամբ ակնհայտ արտացոլված չի եղել Կուսակցության քաղվածքում: Ալետա Հարությունյանի դեպքում կատարվել է 2 առանձին նվիրատվություն, որից մեկի դեպքում ակնհայտ է եղել գերազանցող մասը և անմիջապես կատարվել է հետվերադարձ, իսկ 2-րդի դեպքում, քանի որ նվիրատվությունը եղել է 2.5 մլն ՀՀ դրամի չափով, առերևույթ կասկած չի հարուցել, ուստի այդ մասով տվյալ պահին հետ վերադարձ չի կատարվել: Ավելին, դրա մասին ԿԿՀ-ի կողմից իրազեկվելուց անմիջապես հետո միջոցներ են ձեռնարկվել նվիրատվության սահմանաչափը գերազանցող մասերը հետ վերադարձնելու նպատակով և համապատասխան հիմքերը ներկայացվել են Հանձնաժողով»:

Գործի քննության ընթացքում Մանե Թանդիլյանի ներկայացուցիչ Արաքսյա Գրիգորյանը նշեց, որ Կուսակցության ֆինանսավորման թափանցիկության և հաշվետվողականության սկզբունքներով գործելաոճի վառ ապացույցը այն է, որ Կուսակցությունը ներկայացրել է հաշվետվությունները Մանե Թանդիլյանի ստորագրությամբ և գլխավորությամբ՝ որպես նախագահ, հետևաբար տվյալ դեպքը՝ 2,500,000 և 200,000 դրամ սահմանաչափի գերազանցումը, միտումնավոր չի եղել: Հավելեց նաև, որ Կուսակցությունը դեպքը բացահայտելուց հետո բոլոր միջոցները ձեռնարկել է գումարը ետ վերադարձնելու նվիրատուներին, ինչը պատշաճ իրականացվել է:

III. Գործի քննության ընթացքում հաստատված հանգամանքները

Հանձնաժողովն ուսումնասիրել է թիվ ՎԻՎ/433/2025 գործում առկա նյութերը, կատարել է հանգամանքների քննություն, որի արդյունքում հաստատված է համարում.

3.1 2023 թվականի ընթացքում Կուսակցության պաշտոնատար անձ Մանե Թանդիլյանի կողմից չեն պահպանվել Սահմանադրական օրենքի 24-րդ հոդվածի 5-րդ մասով սահմանված՝ ֆիզիկական անձի կողմից կուսակցությանը տրվող, օրենքով սահմանված սահմանաչափը գերազանցող նվիրատվություններ ստանալուց հետո՝ երկու շաբաթվա ընթացքում, կուսակցության համար սահմանված նվիրատվության գերազանցող մասը կամ նվիրատվությունն ամբողջությամբ նվիրատուին վերադարձնելու, իսկ դրա անհնարինության դեպքում՝ պետական բյուջե փոխանցելու պահանջը: Վերջինիս կողմից 2023 թվականի ընթացքում օրենքով սահմանված ժամկետում կուսակցության համար սահմանված նվիրատվությունը գերազանցող մաս կազմող ընդհանուր 2,700,000 ՀՀ դրամը կամ նվիրատվությունը ամբողջությամբ չի վերադարձվել նվիրատուներին, իսկ դրա անհնարինության դեպքում՝ պետական բյուջե:

3.2 Մինչև վարչական իրավախախտման վերաբերյալ գործի քննության նշանակված օրը Կուսակցության կողմից սահմանված չափը գերազանցող նվիրատվության գումարը՝ 2,700,000 ՀՀ դրամը, օրենքով վերադարձվել է նվիրատուներին:

3.3 Արդարադատության նախարարության իրավաբանական անձանց պետական ռեգիստրի էլեկտրոնային միասնական գրանցամատյանում առկա տվյալների համաձայն՝ Մանե Վանյայի Թանդիլյանը 2021 թվականի նոյեմբերի 12-ից հանդիսանում է Կուսակցության գործադիր մարմնի ղեկավարը՝ նախագահը:

IV. Որոշումն ընդունելու իրավական հիմքերը և հիմնավորումները

4.1 «Կոռուպցիայի կանխարգելման հանձնաժողովի մասին» օրենքի 23-րդ հոդվածի 1-ին մասի 9-րդ կետի համաձայն՝ Հանձնաժողովի գերծառույթն է՝ «Կուսակցությունների մասին» սահմանադրական օրենքով սահմանված դեպքերում և կարգով կուսակցությունների ընթացիկ ֆինանսական գործունեության նկատմամբ վերահսկողության իրականացումը, ներառյալ՝ կուսակցությունների ֆինանսական միջոցների աղբյուրների և ծախսերի, ինչպես նաև գույքի մասին տարեկան հաշվետվությունների (այսուհետ՝ կուսակցությունների տարեկան հաշվետվություններ)

ներկայացման պահանջների պահպանման և դրանցում առկա տեղեկատվության և տվյալների արժանահավատության և ամբողջականության ստուգումը:

4.2 Նույն օրենքի 24-րդ հոդվածի 1-ին մասի 27-րդ կետի համաձայն՝ Հանձնաժողովը ստուգում է կուսակցությունների տարեկան հաշվետվությունների ներկայացման պահանջների պահպանումը և դրանցում առկա տեղեկատվության և տվյալների արժանահավատությունն ու ամբողջականությունը:

4.3 Սահմանադրական օրենքի 30-րդ հոդվածի 1-ին մասի համաձայն՝ կուսակցությունների ընթացիկ ֆինանսական գործունեության նկատմամբ վերահսկողությունը, ներառյալ՝ կուսակցությունների տարեկան հաշվետվության ստուգումն իրականացնում է Կոռուպցիայի կանխարգելման հանձնաժողովը՝ սույն օրենքով և «Կոռուպցիայի կանխարգելման հանձնաժողովի մասին» օրենքով սահմանված կարգով:

4.4 Սահմանադրական օրենքի 2023 թվականին գործող խմբագրության 24-րդ հոդվածի 2-րդ մասի համաձայն՝ Կուսակցությանը տրվող նվիրատվության, ինչպես նաև անդամավճարի և մուտքի վճարի ընդհանուր չափը՝ դրամական արտահայտությամբ, մեկ տարվա ընթացքում չի կարող գերազանցել օրենքով սահմանված նվազագույն աշխատավարձի հինգհարյուրհազարապատիկը, այդ թվում՝ մեկ ֆիզիկական անձի կողմից՝ օրենքով սահմանված նվազագույն աշխատավարձի երկուհազարիինգհարյուրապատիկը:

4.5 Սահմանադրական օրենքի 2023 թվականին գործող խմբագրության 24-րդ հոդվածի 5-րդ մասի համաձայն՝ սույն հոդվածի 2-րդ մասով սահմանված չափը գերազանցող նվիրատվությունների ստացման դեպքում կուսակցությունը պարտավոր է ստանալուց հետո՝ երկու շաբաթվա ընթացքում, կուսակցության համար սահմանված նվիրատվության, անդամավճարի կամ մուտքի վճարի սահմանված չափը գերազանցող մասը կամ նվիրատվությունն ամբողջությամբ վերադարձնել նվիրատուին, իսկ դրա անհնարինության դեպքում՝ փոխանցել պետական բյուջե:

4.6 Օրենսգրքի 189.16-րդ հոդվածի 1-ին մասի համաձայն՝ Կուսակցությունների կողմից օրենքով սահմանված չափից ավելի կամ չթույլատրված նվիրատվությունները օրենքով սահմանված ժամկետներում պետական բյուջե կամ նվիրատուին չփոխանցելը՝

առաջացնում է տուգանքի նշանակում կուսակցության պաշտոնատար անձանց նկատմամբ՝ սահմանված նվազագույն աշխատավարձի հարյուրապատիկից մինչև հարյուրհիսնապատիկի չափով:

4.7 Օրենսգրքի 244.17-րդ հոդվածի համաձայն՝ սույն օրենսգրքի 166.1-ին, 169.28-րդ, 169.31-րդ, 189.13-րդ, 189.14-րդ, 189.15-րդ, 189.16-րդ, 189.19-189.24-րդ, 206.14-րդ հոդվածներով նախատեսված վարչական իրավախախտումների վերաբերյալ գործերը քննում և վարչական տույժեր է նշանակում Կոռուպցիայի կանխարգելման հանձնաժողովը:

4.8 «Կոռուպցիայի կանխարգելման հանձնաժողովի մասին» օրենքի 26-րդ հոդվածի 1-ին մասի համաձայն՝ Վարչական իրավախախտումների վերաբերյալ Հայաստանի Հանրապետության օրենսգրքով նախատեսված վարչական իրավախախտումների վերաբերյալ վարույթի հետ կապված հարաբերությունները կարգավորվում են Վարչական իրավախախտումների վերաբերյալ Հայաստանի Հանրապետության օրենսգրքով, ինչպես նաև «Վարչարարության հիմունքների և վարչական վարույթի մասին» Հայաստանի Հանրապետության օրենքով՝ հաշվի առնելով սույն օրենքով սահմանված առանձնահատկությունները:

4.9 «Կոռուպցիայի կանխարգելման հանձնաժողովի մասին» օրենքի 26-րդ հոդվածի 3-րդ մասի համաձայն՝ Հանձնաժողովը Վարչական իրավախախտումների վերաբերյալ Հայաստանի Հանրապետության օրենսգրքով նախատեսված վարչական իրավախախտումների վերաբերյալ վարույթի արդյունքում ընդունում է որոշումներ, որոնք կարող են բողոքարկվել «Վարչարարության հիմունքների և վարչական վարույթի մասին» Հայաստանի Հանրապետության օրենքին համապատասխան՝ դատական կարգով:

4.10 «Վարչարարության հիմունքների և վարչական վարույթի մասին» օրենքի 37-րդ հոդվածի 1-ին մասի համաձայն՝ վարչական մարմինը պարտավոր է ապահովել փաստական հանգամանքների բազմակողմանի, լրիվ և օբյեկտիվ քննարկումը՝ բացահայտելով գործի բոլոր, այդ թվում՝ վարույթի մասնակիցների օգտին առկա հանգամանքները:

4.11 Օրենսգրքի 252-րդ հոդվածի համաձայն՝ մարմինը ապացույցները գնահատում է իր ներքին համոզմունքով, որը հիմնված է գործի՝ իրենց ամբողջությամբ վերցված բոլոր

հանգամանքների համակողմանի, լրիվ և օբյեկտիվ հետազոտման վրա, ղեկավարվելով օրենքով և իրավագիտակցությամբ:

4.12 Օրենսգրքի 275-րդ հոդվածի համաձայն՝ վարչական իրավախախտման վերաբերյալ գործը քննության նախապատրաստելիս մարմինը (պաշտոնատար անձը) լուծում է հետևյալ հարցերը՝

1) տվյալ գործի քննությունը վերաբերում է, արդյոք, իր իրավասությանը.

2) ճիշտ են կազմվել, արդյոք, վարչական իրավախախտման վերաբերյալ գործի արձանագրությունը և մյուս նյութերը.

3) գործի քննությանը մասնակցող անձինք ծանուցվել են, արդյոք, դրա քննության ժամանակի և տեղի մասին.

4) պահանջվել են, արդյոք, անհրաժեշտ լրացուցիչ նյութեր.

5) վարչական պատասխանատվության ենթարկվող անձի, տուժողի, օրինական ներկայացուցիչների, փաստաբանի միջնորդությունների մասին:

4.13 Օրենսգրքի 282-րդ հոդվածի համաձայն՝ քննելով վարչական իրավախախտման վերաբերյալ գործը, մարմինը (պաշտոնատար անձը) ընդունում է հետևյալ որոշումներից մեկը՝ 1) վարչական տույժ նշանակելու մասին, 2) գործի վարույթը կարճելու մասին: Գործի վարույթը կարճելու մասին որոշում ընդունվում է նաև բանավոր դիտողություն հայտարարելու դեպքում:

Սույն գործով հաստատված փաստական հանգամանքների նկատմամբ կիրառելի իրավական նորմերի վերլուծության արդյունքում Հանձնաժողովն արձանագրում է.

Օրենսգրքի 189.16-րդ հոդվածի 1-ին մասով նախատեսված դրույթը նպատակ է հետապնդում ապահովել հաշվետու տարվա ընթացքում Կուսակցության ֆինանսական միջոցների և ծախսերի վերաբերյալ հանրային հաշվետվողականությունը, կոռուպցիոն ռիսկերից զերծ գործունեությունը: Նշված դրույթի նպատակն է **բոլոր կուսակցությունների համար հավասար հնարավորությունների ապահովումը, ինչպես նաև բոլոր կուսակցությունների ֆինանսական խոցելիության նվազեցման երաշխիքների ապահովումը:**

Նշված դրույթը նպատակ է հետապնդում վերացնել կոռուպցիոն այնպիսի ռիսկեր, ինչպիսիք են, օրինակ, կուսակցության ղեկավար մարմնի անդամի կողմից օրենքով սահմանված չափը գերազանցող նվիրատվության ներգրավումը: Այս զանցակազմի օբյեկտիվ կողմը կարող է դրսևորվել կուսակցության ղեկավար մարմնի անդամի ակտիվ, նախաձեռնողական գործողություններով, երբ վերջիններս ձեռնարկում են կուսակցության օգտին օրենքով սահմանված չափը գերազանցող նվիրատվությունների ներգրավումը կամ պարզապես համաձայնություն են տալիս այդպիսի առաջարկություններին:

Հարկ է ընդգծել, որ Օրենսդրի կողմից նման կարգավորումների՝ սահմանադրական օրենքով ամրագրումն ինքնանպատակ չէ և միտված է կարգավորելու կուսակցությունների մուտքերը՝ կանխելու կուսակցությունների կախվածությունը անհատներից, նպաստելու կուսակցությունների միջև ավելի հավասար պայմանների ապահովմանը, սահմանափակելու կուսակցությունների վրա անտեղի ազդեցությունը՝ խթանելով արդարությունը և նվազեցնելով կոռուպցիայի ռիսկը: Նման կարգավորումների պայմաններում սահմանափակվում են անհատական ներդրումները, ինչը խթանում է քաղաքական գործընթացներում լայն հասարակության ավելի մեծ ներգրավվածությունը և մասնակցությունը:

Միաժամանակ, անհատների կողմից մեծածավալ նվիրատվությունները կարող են հանգեցնել արտոնյալ վերաբերմունքի կամ քաղաքական որոշումների վրա ազդեցության ակնկալիքների և վերը նշված նորմով մեղմվում են նման ռիսկերը՝ դրանով իսկ նպաստելով քաղաքական գործընթացների ամբողջականությանը:

Միաժամանակ, նշված նորմի նպատակն է նաև առանձին անհատների կողմից կուսակցությունների ամբողջական գործունեության ֆինանսավորումից խուսափելը, առանձին կուսակցությունների՝ մեծ կարողություններ ունեցող անհատների «ակումբների» վերաձվելու հնարավորության բացառումը, ինչից ելնելով էլ՝ Օրենսդրի կողմից սահմանվել է անհատների նվիրատվության առավելագույն շեմ:

Խախտման հիմքով պատասխանատվություն սահմանելու հարցը որոշելու համար Հանձնաժողովը գտնում է, որ անհրաժեշտ է յուրաքանչյուր գործով գնահատել, արդյո՞ք

տվյալ խախտումը հանգեցրել է նորմով պաշտպանվող իրավահարաբերությունների խաթարմանը: Այս առնչությամբ էական է խախտման (արարքի) որակական կողմը:

Արարքի որակական կողմը գնահատելիս անհրաժեշտ է հաշվի առնել՝ արդյոք արարքը կարող է պարունակել Օրենսգրքով սահմանված արարքի հատկանիշներ և այնպիսի էական վնաս է պատճառել ֆիզիկական կամ իրավաբանական անձին, հասարակությանը, պետությանը, որի հիմքով սահմանված պատասխանատվությունը կդիտարկվի համաչափ:

Վարչական իրավախախտումների վերաբերյալ ՀՀ օրենսգրքի 21-րդ հոդվածը սահմանել է, որ եթե կատարված վարչական իրավախախտումը նվազ նշանակություն ունի, գործը վճռելու համար լիազորված մարմինը (պաշտոնատար անձը) կարող է խախտողին ազատել վարչական պատասխանատվությունից և բավարարվել բանավոր դիտողությամբ:

Արարքի նվազ նշանակությունը գնահատելիս անհրաժեշտ է հաշվի առնել այն հանգամանքը, որ թեև ձևականորեն արարքը կարող է պարունակել Վարչական իրավախախտումների վերաբերյալ ՀՀ օրենսգրքով սահմանված արարքի հատկանիշներ, սակայն ֆիզիկական կամ իրավաբանական անձին, հասարակությանը, պետությանը այնպիսի էական վնաս չի պատճառվել, որի հիմքով սահմանված պատասխանատվությունը դիտարկվի համաչափ:

Նվազ նշանակությունը կիրառելիս անհրաժեշտ է հաշվի առնել խախտման բնույթը, դրա որակական կողմը, ինչպես նաև խախտում թույլ տված անձի վերաբերմունքը խախտման նկատմամբ:

Սույն գործով խախտման (արարքի) որակական կողմը գնահատելիս Հանձնաժողովն էական է համարում հետևյալ **հանգամանքների միաժամանակյա առկայությունը**.

1. Օրենսգրքի 189.16-րդ հոդվածի 1-ին մասով նախատեսված իրավախախտումների գործերով քննության իրավասությունը Հանձնաժողովին վերապահելուց հետո, նշված դրույթը Կուսակցության կողմից խախտված լինելու առնչությամբ արարքը հայտնաբերվել և նշված խախտման կապակցությամբ ծանուցում է ներկայացվել առաջին անգամ:

2. Մինչև վարչական իրավախախտման վերաբերյալ գործի քննության օրը Կուսակցության կողմից վարչական իրավախախտման վերաբերյալ արձանագրությամբ հաստատված 2,700,000 ՀՀ դրամ՝ օրենքով սահմանված չափից ավելի նվիրատվությունը վերադարձվել է նվիրատուներին, որի վերաբերյալ ապացույցը ներկայացվել է Հանձնաժողով:

Վերոնշյալ հանգամանքների **համակցությամբ** պայմանավորված՝ սույն գործով օրենքով սահմանված չափից ավելի նվիրատվության գումարը նվիրատուին փոխանցելու փաստը վկայող ապացույցը ներկայացնելու արդյունքում Հանձնաժողովն արձանագրում է, որ նորմով պաշտպանվող իրավահարաբերությունների էությունը չի խաթարվել: Պետք է փաստել, որ Հանձնաժողովը նույնական դիրքորոշում է հայտնել նաև ՎԻՎ/265/2024 գործով:

Ելնելով վերոգրյալից, ղեկավարվելով «Կոռուպցիայի կանխարգելման հանձնաժողովի մասին» օրենքի 22-րդ հոդվածի 1-ին մասի 2-րդ կետով, Վարչական իրավախախտումների վերաբերյալ օրենսգրքի 21-րդ հոդվածի 1-ին մասով, 282-րդ հոդվածի 2-րդ կետով և 283-րդ հոդվածով՝ Հանձնաժողովը.

Ո Ր Ո Շ Ե Ց

1. «Ապրելու Երկիր» կուսակցության պաշտոնատար անձ Մանե Թանդիլյանին ազատել վարչական պատասխանատվությունից և հայտարարել բանավոր դիտողություն՝ կարճելով թիվ ՎԻՎ/433/2025 վարչական իրավախախտման վերաբերյալ գործի վարույթը:

2. Սույն որոշումն ուժի մեջ է մտնում այն սահմանված կարգով Մանե Թանդիլյանին հանձնելու (հանձնված համարվելու) հաջորդող օրվանից:

3. Սույն որոշումը կարող է բողոքարկվել ՀՀ օրենսդրությամբ սահմանված կարգով և ժամկետում:

ՀԱՆՁՆԱԺՈՂՈՎԻ ՆԱԽԱԳԱՀԻ

ՊԱՐՏԱԿԱՆՈՒԹՅՈՒՆՆԵՐԸ ԿԱՏԱՐՈՂ՝

ՄԱՐԻԱՄ ԳԱԼՍՏՅԱՆ